

Segun sra. Monica Kock di MEP:

Mientras cu solamente 155 estudiante a gradua di EPI

MEP ta sigui traha mas hotel cu ta crea cupo di trabao pa stranhero so



STA. CRUZ -- Minister Lee a confirma cu un servicio den sector hotelero a bay atras. Cu esey ta trece cu ne cu turista ta scoge pa un otro pais. Minister Lee a splica cu un factor ta e trahador stranhero cu nos tin den e sector hotelero. Segun Minister e trahadornan stranhero no tin e experiencia ni e educacion pa e trabao den sector hotelero. Pero toch MEP ta sigui traha mas hotel cu ta crea cupo di trabao pa stranhero so. Mas stranhero den e sector hotelero, kier meen mas nos calidad lo baha! Un ehempel ta RIU Hotel. Un hotel cu a bin cu bendicion di Minister Presidente pero cu lo baha nos calidad. El'a trece

trabao pa mas stranhero, no Arubiano. Kico Minister Lee a haci contra esaki? Con e ta protege nos trahador Arubano? Un proyecto cu mas ainda no tin ningun loyalidad pa nos pais. No kier tuma Arubiano den servicio. No kier paga pa e expertisio di nos Arubianonan. Hasta ta malinforma e turista cu no por bebe awa di Aruba.

Pero ta e awa di e hotel por ta no ta cumpli door di e tanki cu e tin! Pa soluciona esaki Minister tin como solucion pa stimula nos hobennan. Pero esaki no ta un solucion pa e cantidad cu mester di 6000 trahador den sector hotelero. Pasobra a slaag 155 hoben so na EPI. Esaki a

trece cu ne cu mester 38 aña pa nos yega na un cantidad di 6000 trahador. Pueblo por comprende cu e solucion duna door di Minister Lee ta un solucion fofo.

Pero sabiendo esaki, toch gobierno di MEP a sigui duna permiso pa bin cu asina hopi kamber acerca. Den e periodo di MEP e cantidad di kamber lo crece di 8000 pa 12.000. Pa ken MEP ta creando trabao? MEP no tin vision ni idea den cual rumbo nan ta hiba nos pais. Nos tur lo tin cu carga e consecuncianan di e decisionnan di gobierno di MEP. Lastima, pero realidad ta cu nan kier mas trahador stranhero, pasobra no tin local.